

13 MAY 2003

Hamid-Konsultasi

KURANG KEFAHAMAN PUNCA HIV/AIDS MENULAR DI KALANGAN UMAT ISLAM

PUTRAJAYA, 13 Mei (Bernama) -- Kurang kefahaman mengenai virus kurang daya tahan manusia (HIV) dan Sindrom Kurang Daya Tahan Penyakit (AIDS) menyebabkan penularannya tidak dipandang serius oleh sesetengah pihak termasuk umat Islam.

Menteri di Jabatan Perdana Menteri Datuk Dr Abdul Hamid Zainal Abidin berkata berikutan tiadanya pengetahuan mengenai penyakit itu, mereka menyisihkan penghidap HIV dan AIDS.

"Apa yang menjadi isu sekarang ialah ketidakseragaman pemahaman berhubung penyakit itu," katanya pada sidang media di sini mengenai penganjuran Konsultasi Antarabangsa Kedua Pemimpin-pemimpin Islam Dalam Menangani Isu HIV/AIDS pada 19-23 Mei di Hotel Istana di sini.

Abdul Hamid berkata institusi keagamaan di negara ini turut sama membanteras gejala penyalahgunaan dadah yang dilihat sebagai penyebab utama ramai orang Melayu dijangkiti HIV/AIDS, dengan mengadakan ceramah dan kursus motivasi.

"Kesedaran yang ada itu perlu dipertingkatkan lagi supaya generasi akan datang boleh dielak daripada terjebak dengan penyalahgunaan dadah dan dijangkiti penyakit merbahaya ini," katanya.

Presiden Majlis AIDS Malaysia (MAM) Datuk Paduka Marina Mahathir berkata sehingga tahun lepas, sebanyak 34,505 atau 72.4 peratus pesakit HIV/AIDS terdiri daripada golongan Melayu.

Beliau berkata majlis konsultasi itu dapat menghimpun tokoh-tokoh agama, penyelidik, pemimpin badan bukan kerajaan (NGO) dan pemimpin masyarakat dari negara-negara Islam untuk bertukar-tukar pendapat mengenai cara mengatasi masalah penularan penyakit itu yang sehingga kini masih belum ada penawarnya.

"Ia juga boleh digunakan untuk membentuk jaringan antara pemimpin Islam seluruh dunia dalam mempertingkatkan kesedaran, pemahaman dan maklumat yang diperolehi," katanya.

Konsultasi itu, anjuran bersama Jabatan Kemajuan Islam Malaysia (Jakim) dan MAM, dijangka dihadiri kira-kira 300 peserta.

Konsultasi bertema "Ummah Yang Penyayang: Transformasi Sebuah Respons" itu antara lain bertujuan mewujudkan pelan tindakan dan piagam yang membolehkan masyarakat Islam membentuk persekitaran untuk mengatasi HIV/AIDS mengikut pendekatan Islam.

-- BERNAMA

FA MAM NAK